

Script of Evening Gojri News Bulletin 18 October 2024 at 1700 Hrs

ایوننگ گو جری نیوز بلیٹن مورخہ 18 اکتوبر 2024

یوہ آکا شوانی جموں ہے عبدالرحمن تے محمد آصف لو دھی تیں خبر سٹو۔ پہلاں خاص خاص خبر۔

- *1 مرکزی زیر انتظام علاقہ جموں کشمیر غی حکومت نے نواں مقرر کیا گیا کا بینہ وزراء نانہہ بکھ بکھ محکماں غا قلمدان سونپیا گیا ہیں۔
- *2۔ نائب صدر جمہوریہ جگدیپ دھنکر نے کہیو ہے جے انسانی حقوق ہمیشہ بھارت غا اخلاقی اصولاں ور مبنی رہیو ہے۔
- *3۔ وزیر اعظم نریندر مو دی نوی دہلی مانہہ سیکھن بارے قومی ہفتہ یعنی کرم یوگی سپتہہ نانہہ شروع کراویں گا۔
- *4۔ وزیر اعظم نریندر مو دی کازان مانہہ منعقد ہون آلی بریکس ملکاں غی سربراہ کانفرنس مانہہ شرکت با رے روس غا 2 روزہ دورہ ور جائیں گا۔

خبراں غی تفصیل نال پہلاں محمد آصف لو دھی۔

LG Portfolios

جموں کشمیر مانہہ نواں مقرر کیا گیا کا بینہ وزراء نانہہ بکھ بکھ محکماں غو قلمدان سونپیو گیو ہے۔ اس سلسلہ مانہہ آکاشوانی جموں غا مہا را نمائندہ نے دسیو ہے جے لیفٹنٹ گو رنر منوج سنہا غی طرفوں جا ری اک اعلانیہ مانہہ جانکا ری دتی گئی ہے کہ جموں کشمیر مانہہ وزراء نانہہ بکھ بکھ محکماں غی ذمہ داری سونپی گئی ہیں۔ جس مانہہ نائب وزیر اعلیٰ سریندر کمار چودھری نانہہ عوامی کماں کاجاں بارے محکمو یعنی پی ڈبلیو ڈی، صنعت و تجارت تے ہنر ترقیات محکمو، سکینہ مسعود ایتو نانہہ صحت، اسکولی تے طبی تعلیم تے سماجی بہبود محکمہ، جا وید احمد رانا نانہہ جل شکتی، جنگلات و ماحولیات تے قبائلی بھلائی بہتری بارے محکمہ، جا وید احمد ڈار نانہہ ذراعی پیداوار، گرائیں ترقی تے پنچایتی راج محکمو جد کہ سنیش شرما نانہہ خوراک سول سپلائز امور صارفین، ٹرانسپورٹ، اطلاعات ٹیکنالوجی تے نوجوان خدمات با رے محکمہ غو قلمدان سونپیو گیو ہے۔ راج بھون غی طرفوں جا ری ایکن حکم نامہ مانہہ دسیو گیو ہے جے باقی تمام محکماں غو قلمدان جموں کشمیر غا وزیر اعلیٰ عمر عبداللہ کولے رہے گو۔

VP NHRC

نائب صدر جمہوریہ جگدیپ دھنکر نے کہیو ہے کہ انسانی حقوق ہمیشہ بھارت غا اخلاقی اصولاں ور مبنی رہیو ہے۔ نوی دہلی مانہہ اج انسانی حقوق غا کمیشن بارے قومی یوم تاسیس منایا جان غا موقعہ ور بولتاں واں انہاں نے کہیو جے بھارتی آئین انسانی حقوق بارے قطبی تارا غی اہمیت رکھے۔ نائب صدر۔ جمہوریہ نے کہیو جے بھارتی آئین ملک غا تمام شہریاں نانہہ انصاف، برابری تے آزادی مہیا کراوے۔ یوم تاسیس غا موقعہ ور بولتاں واں جناب دھنکر نے کہیو جے آپسی فرقو فرقی انسانی حقوق بارے اک بڑی للکار ہے جس خاطر کسے وی تشدد غے خلاف لڑن و اسطے ملک غا لوکاں نانہہ اک جٹ ہون غی لوڑ ہے۔ اُن نے کہیو جے دوجاں غی انسانی حقوق غی عزت تے راکھی کرنو مہارو اولین فرض ہے۔ اس موقعہ ور انسانی حقوق بارے کمیشن غا چیرمین وجے بھارتی لال نے وی ات موجود لوکاں سنگ خطاب کیو۔

HC Nominate MLA's

جموں کشمیر تے لداخ غی عدالت عالیہ گا اک خصوصی ڈویژن بنج غی طرفوں جموں کشمیر قانون ساز اسمبلی مانہہ 5 ممبران نانہہ نامزد کرن بارے لیفٹنٹ گو رنر غا اختیار ات غے خلاف اک مقدمہ غی اگلے مہینے سنوائی کی جائے گی۔ اس سلسلہ مانہہ آکاشوانی جموں غا نمائندہ نے دسیو ہے جے چیف جسٹس تاشی ربتان نے اس معاملہ غی سنوائی بارے اک خصوصی ڈویژن بنج بنان بارے عرضی گزار رویندر شرما غی گزارش نانہہ تسلیم کر ليو ہے۔ جس نے اس معاملہ بارے فوری سنوائی بارے گزارش کی تھی۔ واضع رہے جے اس بارے معاملو پہلاں عدالت عظمیٰ مانہہ لیو گیو جس نے 14 اکتوبر نانہہ اس معاملہ نانہہ چان تیں منع کرتاں واں عرضی گزار نانہہ صلاح دتی تھی جے وے جموں کشمیر غی عدالت

عالیہ مانہہ اس معاملہ بارے رجوع کریں۔ رویندر شرما جہڑا جے قانون ساز کو نسل غا سابق ممیر تے پر دیش کا نگریس کمیٹی غا سینئر نائب صدر ہیں نے جموں کشمیر تنظیم نو قانون گا اس قدم نانہہ للکاریو ہے۔ جہڑو جے لیفٹنٹ گورنر نانہہ 5 ممبراں نانہہ اسمبلی مانہہ نامزد کرن بارے اختیارہ۔

SC SH Restoration

عدالتِ عظمیٰ نے جاتے روز جموں کشمیر ریاست غو درجو بحال کرن غی خاطر اک مقررہ مدت غے اندر فیصلو سُنان بارے اک عرضی ور غو ر کرن واسطے رضا مندی ظاہر کی ہے۔ اس سلسلہ مانہہ آکا شوانی جموں غا مہارا ناماندہ نے جانکاری دتی ہے جے اس معاملہ مانہہ گوپال شنکر نرائین نامی اک سینئر وکیل نے چیف جسٹس ڈی وائی چندر چوڈ غی سر برابی آلا 3 رکنی عدالتی بنچ غے سامنے عرضی دائر کرتاں واں درخواست کی ہے جے آئین غی دفعہ 370 غا معاملہ مانہہ جموں کشمیر نانہہ ریاست غو درجو دین بارے اک مدت مقرر کی جائے۔ واضح رہے جے چیف جسٹس نے درخواست ور رضامندی ظاہر کر لی ہے۔ واضح رہے جے عدالتِ عظمیٰ مانہہ متفرق دائر عرضی مانہہ آئین غی دفعہ 370 غے متعلق معاملہ غو وی ذکر کیو گیو ہے۔ یاد رہے جے عدالت جموں کشمیر ترمیمی پل 2019 غے ذریعے آئینی طور ور برائے راست جموں کشمیر مانہہ حکمرانی نہیں کر سکتی۔ جس گا تناظر مانہہ عدالتِ عظمیٰ نے کہیو ہے جے جتنو جلدی ممکن ہو سکے جموں کشمیر ریاست غو درجو بحال ہونو چاہیے ور اس خاطر عدالت نے کوئے مقررہ مدت واضح نہیں کی ہے۔ اس سلسلہ مانہہ ظہور احمد بھٹ تے خورشید احمد ملک نامی 2 درخواست گزاراں نے تشویش ظاہر کرتاں واں کہیو ہے جے گذشتہ 11 مہیناں غے دوران عدالت غی طرفوں دتا گیا فیصلہ ور مرکزی حکومت نے اجوں توڑی جموں کشمیر ریاست غو درجو بحال کرن بارے کوئے وی اقدام نہیں چایا ہیں۔

NMB Poonch

نشہ جیسی بُری بدعت نانہہ سماج تیں ختم کرن گا سلسلہ مانہہ لوکاں توڑی جانکاری عام کرن غی خاطر ضلع انتظامیہ پونچھ نے سماجی بہبود محکمہ غا اشتراک نال نشہ مُکت بھارت پروگرام غے تحت 1 روزہ سیمینار غو انعقاد کیو۔ واضح رہے جے اس پروگرام مانہہ 300 تیں متا طالب علماں نے حصول غے نشہ تیں پاک سماج بنان غا سنیہا نانہہ لوکاں توڑی پچایو ہے۔ پونچھ تیں مہارا ضلع نامہ نگار انوبھو مصری نے جانکاری دتی ہے جے اس پروگرام گا موقعہ ور پونچھ گا ضلع ترقیاتی کمشنر وکاس گنڈل مہمان خصوصی گا طور ور ات موجو دتھا۔ اس موقعہ ور میڈیا سنگ گل کرتاں واں ڈی سی موصوف نے سماجی بہبود محکمہ غی طرفوں اس قسم غا پروگرام منعقد کرایا جان ور مُج تعریف کی ہے۔ اُن نے کہیو جے سماج تیں نشہ جیسی بُری بدعت نانہہ ختم کرن غی خاطر طالب علماں تے سماج غا دوجا لوکاں نانہہ باندے اُن غی لوڑ ہے۔ اس موقعہ ور تمام شراکت داراں نے پونچھ ضلع نانہہ نشہ تیں پاک بنان غو عہد کیو ہے۔

HADP Rajouri

راجوری گا ضلع ترقیاتی کمشنر ابھیشیک شرما نے جاتے روز ضلع سطح غی کمیٹی غی اک میٹنگ بلا غے ایچ اے ڈی پی یعنی مجموعی ذریعی ترقیاتی پروگرام غے تحت کئی معاملان نانہہ منظوری دتی ہے۔ اس موقعہ ور ڈی سی موصوف نے محکمہ ذراعت غا عہدیداراں نانہہ ہدایت کی ہے جے وے تمام کساناں کے سی سی کارڈ جاری کر غے بکھ بکھ ذریعی سکیمان غے تحت مالی امداد مہیا کرائی جائیں۔ اس موقعہ ور ڈی سی موصوف نانہہ جانکاری دتی گئی ہے کہ متا سارا معاملہ زمینی کا غذات مکمل نہ ہون غی وجہ تیں اجوں بقایا ہیں۔ اس دوران جناب شرما نے متعلقین نانہہ سختی نال ہدایت کرتاں واں کہیو جے تمام کسان درخواست گزاراں غا معاملان نانہہ جلدتوں جلد نمیز غے اُن نانہہ مالی امداد فراہم کی جائے۔

یہ خیر تم آکا شوانی جموں تیں سُن ریبیا ہیں خبراں غا باقی حصہ نال عبدالرحمن۔

PM Karamyogi

وزیر اعظم نریندر مو دی پلک نوی دہلی مانہہ کرم یوگی سپتہ یعنی سیکھن بارے قومی ہفتہ این ایل ڈبلیو نانہہ شروع کراویں گا۔ اس ہفتہ غے دوران ہر اک کرم یوگی کہٹوں کہٹ 4 گھنٹاں غو قابلیت سنگ منسلک

سیکھن غو نشانو حاصل کرن غو عزم کرے گو۔ این ایل ڈبلیو نانہہ شراکت کرن آلا ذاتی افراد، وزارتوں، محکماں تے تنظیمیاں غی طرفوں بکھ بکھ طریقیاں سنگ سیکھن بارے وقف کیو جا ئے گو۔ اس مانہہ شرکت کرن آلا افراد ”آئی گوٹ“ ور مشہور افراد غی طرفوں وینار، عوامی لیکچر تے پالیسی ماسٹر کلاسیں غے ذریعے افرادی رول بنیا د، ماڈیول آلا گھنٹاں گا نشانہ نانہہ حاصل کر سکیں۔ اس ہفتہ غے دوران نامور مقررین بڑا موثر طریقہ سنگ اہمیتی معاملات ور بات چیت کرینگا۔ وزارتوں، محکماں، تنظیمیاں غی طرفوں مخصوص قابلیتاں بارے سیمینار تے ورکشاپ منعقد کیا جا ئیں گا۔ سیکھن بارے قومی ہفتو یعنی این ایل ڈبلیو اپنی قسم غو اک بڑو پروگرام وے گو۔ جہیڑو کہ افراد نانہہ تے محکماں و تنظیمیاں نانہہ ملازمین نانہہ صلاحیتی ترقی بارے قوت مہیا کراوے گو۔

PM Russia

وزیر اعظم نریندر مو دی اس مہینہ غی 22 تا ریخ تیں روس گا 2 روزہ دورہ و ر جا ئیں گا۔ وے ات برازیل، روس، بھارت، چین اور جنوبی افریقہ یعنی ”بریکس“ کی سربراہ میٹنگ مانہہ شرکت کریں گا۔ کازان مانہہ یاه سربراہ کا نفرنس محض عالمی ترقی اور سلامتی واسطے کثیر ملکی نظام نانہہ مستحکم کرن کا موضوع ور منعقد وے گی۔ اس سربراہ کا نفرنس سنگ عالمی بنیا دی مسائل ور بات چیت واسطے لیڈراں نانہہ اک اہم پلیٹ فارم فراہم وے گو۔ وزارت خارجہ غی طرفوں اک بیان مانہہ کہیو گیو ہے جے وزیر اعظم جناب مو دی متوقع طور بریکس ممبر ملکاں غا اپنا ہم منصبان سنگ دو طرفہ میٹنگ وی لا ویں گاتے اس دورہ غے دوران انہاں نانہہ دعوت وی دیں گا۔

Rajnath DRDO

وزیر دفاع راجناتھ سنگھ نے اج کہیو ہے جے دفاعی سیکٹر مانہہ غیر روایتی جنگی کرایا نے نوی للکار سامنے آئی ہیں۔ انہاں نے کہیو ہے جے ٹیکنالوجی نے اس نوی قسم غا غیر روایتی جنگی کرایہ، ڈرونز، سائبر جنگی کرایہ تے حیا تیاطی ہتھیاراں آلی بڑی للکاراں نانہہ خلائی دفاع غے سامنے اُبھاریو ہے۔ وزیر دفاع نوی دہلی مانہہ خواب دیکھتاں غی ہمت 5.0 اختراعی مقابلہ نانہہ شروع کروان غا موقعہ ور بول رہیا تھا۔ جدت بارے حکومت غا عزم نانہہ آجاگر کرتاں واں جناب راجناتھ سنگھ نے کہیو جے دفاعی سیکٹر مانہہ تحقیق اور ترقی غی اہمیت نانہہ بدھایو جا ئے۔ انہاں نے کہیو جے جد عالمی دنیا تبدیلی گو مشاہدو کر رہی ہے تاں ٹیکنالوجی، تحقیق، ترقی غی وی اسے رفتار سنگ بدھن غی اہمیت ہے۔ انہاں نے کہیو حکومت ملک غا دفاعی سیکٹر نانہہ ٹیکنالوجی آلی مزید جدت آلو بنان بارے پُر عزم ہے۔ انہاں نے لگاتار بہتری تے خلاء انگیز ٹیکنالوجی بارے دفاعی سیکٹر مانہہ نجی سیکٹر غی وسیع شراکت بارے وی کہیو۔ انہاں نے خواب دیکھن غی ہمت ناں آلا پروگرام مانہہ شرکت کرن آلاں نانہہ مبا رکبا دپیش کی تے کہیو جے جد نوجوان گجھ نووں دیکھن بارے خواب دیکھن غی ہمت کرے تاں ان خواباں نانہہ پوراں کرن بارے نواں رستہ وی تیار کیا جا سکیں۔

SC Child Marriage

عدالتی عظمیٰ سپریم کورٹ غو اج کہنو ہے جے چھوٹی عمر مانہہ بچاں غی شادی غی ممانت آلا قانون نانہہ ذاتی قوانین سنگ نہیں روکیو جا سکتو۔ تے لوہکی عمر غا بچاں غی شادی کروان سنگ اپنی مرضی غو زندگی غو ساتھی چُنن بارے اُن غی مرضی و آزادی چھین جا ئے۔ چیف جسٹس ڈی وائی چندر چڈ، جسٹس جے بی پردی والا تے جسٹس منوج مسرہ و رمشتمل اک عدالتی بنچ نے ملک مانہہ چھوٹی عمر گا بچاں غی شادی غی ضمانت بارے قوانین غی موثر عمل آوری واسطے ہدایت وی جا رکی ہیں۔

CS Marathon

اس مہینہ غی 20 تا ریخ نانہہ لمبی دوڑ بارے پروگرام منعقد کرایا جان غا سلسلہ مانہہ چیف سیکریٹری اٹل ڈنو نے جا تے روز سرینگر مانہہ محکمہ سیاحت غی طرفوں منعقدہ 3 روزہ کشمیر میراتھن نمائشغو افتتاح کیو۔ اس موقعہ ور صوبائی کمشنر کشمیر، محکمہ سیاحت گا کمشنر سیکریٹری سمیت کئی دوجا عہدیدار وی اُت موجو دتھا۔ اس افتتاحی تقریب غا موقعہ ور بولتاں واں چیف سیکریٹری نے کہیو جے اس دوڑ مانہہ کو ئے 2 ہزار غے قریب تربیت یافتہ نوجوان کھلاڑی حصو لے رہیا ہیں۔ اُن نے کہیو جے اس مہم گا

پروگرام منعقد کروان نال جموں کشمیر غی سیاحت مانہہ باہدو درج کیو جائے گو۔ جس غی مدد نال ات غا ہنر مندائ غی طرفوں بنایا گیا سامان غی نمائش کر غے ان غی آمدنی دگنی ہو سکے گی۔ ان نے یوہ وی کہیو جے سیاحت نانہہ باہدو دین غی وجہ نال کاروبار نانہہ خاصی مدد لے گی نالے مہارا نوجوان روزگار حاصل کر سکیں گا۔ جناب ڈلو نے ان گلاں کو اظہار افتتاحی تقریب گے دوجے پاسے میڈیا غا نمائندائ سنگ گل کرتاں واں کیو ہے۔ اس موقعہ ور بولتاں واں جناب ڈلو نے کہیو جے اس دوڑ مانہہ حصو لین آلاں واسطے ہتھ کھڈی تے دستکاری یعنی ہتھ نال تیار کیا سامان غی نمائش وی لائی جائے گی۔

KVK Kathua

کریشی وگیان کیندر کٹھوعہ غی طرفوں جاتے روز ربیع کسان میلہ غو انعقاد کیو گیو۔ واضع رہ جے یوہ میلہ ذرعی یونیورسٹی جموں غی سربراہی مانہہ منعقد کرایو گیو۔ جس دوران کٹھوعہ ضلع غی ہیرا نگر تحصیل غا سابق پنچاں تے سرپنچاں نے متی تعداد مانہہ شمولیت کی۔ دسیو گیو ہے کہ اس میلہ مانہہ 500 تیں متا کساناں نے شمولیت کی ہے۔ میلہ غے دوران کساناں نانہہ زمین غی رائی بائی غی کاٹر ٹیکنالوجی بارے جانکاری دتی گئی۔ واضع رہ جے اس میلہ غو افتتاح ذرعی یونیورسٹی جموں غا وائس چانسلر ڈاکٹر بی این تریپاٹھی نے کیو۔ بعد مانہہ وائس چانسلر نے محکمہ باغبانی، مالی چوکھر تے مچھلی پالن سمیت کئی دوجا محکماں غی طرفوں لائی گئی نمائش غو وی جائزو لیو۔ اس موقعہ ور بولتاں واں ڈاکٹر تریپاٹھی نے کہے وی کہ کٹھوعہ غی طرفوں کساناں غی بھلائی بہتری غی خاطر بکھ بکھ سکیمان نانہہ عملاپا جان ور لو کہلی۔ ان نے ضلع غا کساناں نانہہ صلاح دتی ہے کہ وے کریشی ویگیان کیندر کٹھوعہ نال جڑ غے اپنا ہنر مانہہ باہدو کریں تا نجے ذرعی پیداوار نانہہ متو فائدو مند بنایو جا سکے۔

اس غے نال ہی خبراں غو یوہ بلیٹن ختم ہوؤ۔

News Read by:- Mohd Asif Lodhi & Abdul Rehman

News Editor:- Ashok Kumar Mota

DEO:- Alam Khan

Skilled:- Tarsem Lal